



17470

17470

I

Mag. St. Dr.

P

Hieronymus

Distavensis


Bucci Thomae Oratio in anniver-  
sario celebrata.

PALEOG. et VITAE

Polon. 4<sup>e</sup>

797







X

O R A T I O  
IN ANNIVERSARIO  
Ill<sup>mi</sup> & Reueren<sup>ti</sup> Domini D. Hiero-  
nymi Comitis à Rozrazow, olim  
Episcopi Vladislauien<sup>si</sup> & Pomeraniæ. &c.

IN ECCLESIA  
Collegiata S. Michaëlis in Arce Cracouiē  
celebrato.

H A B I T A  
*A. Rūdo Thoma Bucio I. V. D. ad eandem Ecclesiam  
Custode. Die ix Februarij.  
M D C I.*



C R A C O V I Æ,  
Excudebat Simon Kempinius.  
Anno Dñi. 1 6 0 1.



IN ARMA.



17470I

Hasce Rosas gelidi quas produxere Triones  
Invidit patrio Roma sacra ta, solo  
Elisij, mundo: sæcliq; extrema prioris,  
Huicce nouo; æternus sed bene mansit odor.

Albertus Kozupski Canon.  
S. Michaël, Crac.



# ORATIO.



ON est expectandum à me Auditores Amplis. vt Episcopi Vladislauieñ Hieronymi Comitis Rozrazouij mortē, quem superiore anno Deus ex hac fluxa & caduca vita ad æternam euocauit, apud vos lachrymis prosequar vel lugendam vobis proponam. Quisquis enim queritur aliquem mortuum esse, queritur hominem fuisse, cum eadem nobis omnibus moriendi conditio sit, quibusdam solum exitus interuallis distinguamur, vt alter citius præcurrat, alter tardius sequatur. Hominem autem fuisse, queri, eum præsertim, cuius ornamentis necessariae ad vitæ humanæ rationes moderandas doctrinæ, maxima sane iactura carendum erat; vecordiæ esset simillimum. Illud ergo tantum reliquum mihi video, cuius me vos tam illustri & Christiana in defunctum pietate, atque ista celebri frequentia admonetis; vt cum vniuscuiusque funus, sit quædam tabula rasa, in qua demum vita hominis rectè exarari debeat, quod ante mortem vel veterum illorum sapientum sententia, nemo vnquam beatus dici, nemo integrè ante ultimam humanorum periodum prædicari posset: sequar in eo voluntatem & iudicium vestrum, vt quod vos, hoc iam decurso anno, memoriæ ipsius inscribendum communi & constanti sensu passim decreueritis, ex hoc loco



vna vobiscum recognoscam. Amplius enim laudare qui  
possum? cum & tribuere vltra quam par esset, offendere  
propius foret quam ornare; & vnius cuiusque mens, alia  
quidem in aures alia in animum admitat. Nollem etiam  
abuti benevolentia & patientia vestra, vt aliqua quæ pu-  
blica fama ad vos perferre minus potuerit, inter laudes  
viri congeram. Maximas autem & præstantissimas virtu-  
tes in viris magnis non ita facile ad quosuis patere, & quo  
altiores eo magis ad externos tectas esse, non rarum est;  
quod omnia quæ foras emanant, necessario nisi quem er-  
ror delectet, ad vnum qui in occulto manet finem & qui  
totius consilij est regula, referri debeant. Ex quibus non-  
nulla, licet vnus inter paucos hic sim, qui penes ipsum a-  
liquot annos versatus, tãquam iis ad quos solet esse quis-  
piam apertior melius perspecta in medium adferre pos-  
sem; eaq; vt non minimam admirationem, voluptatem  
certe non vulgarem, in animis piorum excitare possent:  
quod tamen liberalitate ipsius ad Ecclesiam hanc cuius  
Episcopis Vladislauieñ Ius patronatus maxima ex parte  
competit, promotus, non parum ipsi debere videar; sub-  
uereri venit in mentem, ne forte quispiam minus sibi  
exploratam narrationem meam, debita mea in defun-  
cti memoriam obseruantia metiri velit. Pròinde absti-  
nendum mihi duxi penitus eiusmodi commemoratione,  
nisi quatenus vos ipsi attentione vestra, authores mihi  
& hortatores fueritis, vt etiam de penitioribus non nihil  
aperiam atq; delicatiorũ aliquam partem vobis faciam.

Duo



Duo autem sunt, quæ vitam viri intuentibus, statim occurrunt, Vocationis Episcopalis præstantia & integritas, functionisque eiusdem zelus & scientia; tum Senatoriæ dignitatis prudentia & authoritas: vitæ vero priuatæ castitas & sanctimonia, morum constantia & grauitas, hæc tertio loco, eo pertinent, quæ attentioni vestræ debita recordabor. Attendite igitur & fauete.

Atque vt à vocationis præstantia & integritate ordiar, Aud: videor mihi illud D. Chrysostomi quasi de Rozazeuio relatum agnoscere, qui ait. *quum de Ecclesiastica præfectura agitur, illi soli in medium prodeant, qui ita charitate reliquis excellunt, quantum corporis magnitudine Saul reliquum populum superauit, quum in Regem crearetur.* quod sapientissimus Stephanus Rex in ipsius nominatione diligenter obseruasse inprimis videtur. Nam cum Ecclesia Vladislauiensis ex promotione ad Archiepiscopatum Illustris. Dñi Stanislai Carnouij feliciter moderni vacaret, multos sibi offerebat, aulica illa prensatio, imò & propior quidam vt iam inoleuit gradus qui omnes tam præstanti Cathedra, & secundo inter Episcopatus loco posita sese potituros non desperabât. Vt autè in omnibus Episcopatibus tam inferioris quàm altioris loci inter ipsam functionem nihil interest, cum vtrobique oues, vtrobique pastor, eandem curam, scientiam, assiduitatem, & pascuorum fertilitatem poscere videantur, multum tamen refert, quum de ouilis amplitudine agitur, cui comittendum sit, cum non omnes tan-



tum complecti industria, valere iudicio, adniti diligentia possint, vt nisi rectè pauca prius curauerint, statim ampliora sibi concedi, tuto queant, iuxta illud Dominicum, *quia in pauca fuisti fidelis supra multa te constituam.* Hęc igitur cum Rex ille identidē animo volutaret, vt non non solum eum præficeret, qui cum dignitate personam Episcopalem sustinere, sed qui etiam pro loci eminentia, eum fructu in excelsiore illa specula collocari posset; hunc Rozrazouium Præpositū tunc Plocensem & Regni Secretarium iudicauit reliquis præferendum. Vehemens enim erat, pientissimo Regi, euidenti indicio, hūc ipsum quem D. Chrysostomus requirit charitatis altioris verticem in Rozrazouio probauisse; cum in primis licet extra Episcopale munus, sed tamen erga sibi commissos, latiora quædam dilectionis viscera in illo deprehenderet. Amorem autem suū facile ex eo arguas, quem diuidi quis non patitur, & in plura non diffundit. quod vt faceret Rozrazouius, Præposituram. Cathedralis Vratisslauiē in Silesia, quam Pij V. Pont. Max. liberalitate consecutus fuerat, haud diu cum Plocē retinere voluit, cum neutris se satisfacere posse intelligeret, nisi alteros dimisisset, & alteros non nisi vehementer diligere non poterat. Ideoque & hanc ipsam Plocē, ita retinebat vt perpetuo cogitaret, qua ratione ex aulæ occupationibus sese explicare & suis tandem deditus esse posset. Quod ipsum Stephanus Rex, cum non obscure pro diuino suo ingenio assequeretur, nihilominus in ista deman-



demandandi Episcopatus deliberatione ipsam quoque  
Dei dilectionem quæ iam sibi constiterat, sed illustrius  
adhuc, *an omni occasione coram Deo ambularet & esset perfe-*  
*ctus* elicere statuit; cum animum viri variis turba-  
tionibus per subornatos homines experiri prius volu-  
isset, si quam forte prudentiam filiorum huius sæculi ex-  
primere sibi possent. Verum ille, à recto tramite, & pu-  
ra in Dei honorẽ intentione ne latum quidem quod a-  
iunt vnguẽ se dimoueri passus est: ita vt nõnullis qui sibi  
elegantiores & cultiores videri voluerunt, siluestre tum  
illud videretur vitium, sed quod Regis iudicio magnæ e-  
rat fertilitatis indicium. Itaque cum iam satis tentatã ha-  
beret viri virtutem, nec vlla ratione posse inflecti experire-  
tur, accito tandem eo Episcopatum ipsi contulit. Gra-  
tulabundus sibi quasi & Episcopatui illi, quod incõcus-  
sum omnibus Ecclesiæ & Reipub. tempestatibus virum  
legerit, quem tot machinæ infringere non potuerint, &  
qui proculdubio perrecturus erat in concredita sibi pro-  
uincia idem animi & fortitudinis ostendere. Agnoscere  
enim erat, sicut ex vngue Leonem, ita ex animi robore in-  
victo, fratrem vere fuisse Christopherei illius Præfecti Lan-  
cicien, qui vllis pro patria periculis terreri nescius ad Za-  
uolociam in Moschouia paulo ante ceciderat. Ita tum  
Stephanus Rex longe illa bellica sua gloria superior, non  
Rozrazouio sed virtuti honores mandabat, quæ pro ipso  
apud Regem prensauerat & ambierat. Hic ego exclama-  
rem & miseram quorundam temporum conditionem  
deplo-



deplorarem, quando haud infrequens erat, vocationis  
eiusmodi facilitatem aliunde deriuari quam vnde debe-  
ret. Sed quod alieno dedecore sua ornari perperam  
soleant; semel iam obducti vulneris acerbiter, de-  
fecta cicatrice, recrudescere in animis vestris non pati-  
ar. Suffecerit, aperto hoc vocationis recto & simpli-  
cistico & introitu, iam ad Cathedram seu functionis ze-  
lum & scientiam descendere; quæ latius aliquando patet,  
& circa religionem, disciplinam, libertatum Ecclesiarum  
tutellam, potissimum versatur.

De religionis qui-  
dem restitutione, cum illa temporum facies incidisset, vt  
fœde vbique prostrata iaceret, quid ego potissimum re-  
feram? Nam & externa hæc Catholicæ religionis, ritum  
nempe cultus diuini, passim neglectum; & multis igno-  
rantia spinis & vepribus siluescentem, per totam Dioce-  
sim ad pristinum decus & frequentationem reuocasse,  
non minimi res, erat negotij; quanto molestius esse solet  
otio diffuentes & ignauia torpentes Athletas ad pale-  
stram reuocare, quam Tyrunculos in arenam producere.  
Quis autem ea in re zelus suus fuerit, antelucanæ illæ suæ  
dum penes Cathedrâ esset templi frequentationes, quan-  
do signo dato, Canonicos celeritate anteuertere iucundû  
in primis habebat satis ostendunt. atque inibi per totum  
decantati officij spatium, sic inuicta perseuerantia, vt inter-  
rim nusquam non solum corpore verumetiam mente, diuer-  
tendû sibi putaret, nisi attentissime ad illius cantus Eccle-  
siastici melodiâ cõposito & defixo animo, dulciorem il-  
lam.



Iam spiritualem harmoniam totis præcordiis degustaret. Ingeminans illud Psalmistæ. *Paratum cor meum Deus, paratum cor meum, exurge gloria mea, exurge psalterium & cythara.* Ideoque & instrumentali musica impensius delectabatur, illa nimirum cuius ad Ecclesiam assiduus usus esset. Nam ad mensam animi vel aurium causa, tunc demum locus, erat ubi prius prælectionis SS. Patrum suauissimo concentu Spiritum refecisset, eamque ipsam augendę deuotionis & pię hilaritatis instituto, potissimum introduxisset; quandoquidem passim vix aliud, quam Dauidici Psalmi vel patrij & populares de tempore hymni ad cytharas & tibias cantarentur; quibus ille veteris nostratium pietatis æmulus, haud satis vnquam satiari poterat. Huius autem suę Spiritualis & Ecclesiasticę iubilationis, insigne vltimo vitę suę anno penes Cathedrã reliquit monumentum: cum organa aliquot millium sumptu, præstantissimę melodię, & illorum quę toto in Regno famosissima habentur æmula, construi curauerit. Sed hoc potius ad ornatum & decorem domus Dei pertinet, quem ille tenerimè & vnice dilexit. Vt nullam fere Ecclesiam in Episcopatus sui bonis reliquerit, quam non vel restauratione, vel apparatu & suppelectili Ecclesiastica, vel etiam externo isto nitore, altaria nouis imaginibus & augustiore, quadam pulchritudine ac variis picturis exornando, cohonestauerit. Cathedralem vero suam præ ceteris maximè. Cui etiam omne argentum Ecclesiasticum quo Episcopus ad sacra utebatur, insigni opere in Vrbe reno-



uatum, vna cum annulo, quo ipsam sibi subarhauerat dominus, post mortem transmitti fecit. Non commemoro isthic, pretiosam diuersorum colorum & materiarum, sacrorum & altarium suppellectilem, qua hæc sponsa sua olim propè lacera & pauper, cum diuitibus hoc in Regno certare iam potest. Sed quomodo in templis ornandis exauriri poterat is, qui metuēs forte, cum iam tot liberalitate sua peruagatus esset, ne ipsi similis munificentiae deesset campus, noua etiam templa à fundamentis excitare perrexerit? vt haberet opinor, quod lautius ornaret, & ingenium Ecclesiastici splendoris auidissimum, in dies magis ac magis exerceret.

Porro viuua ipsa Dei templa, ouile scilicet suum, fæda heresi abominabile, vt nouum quasi nuptiali thalamo præparatum & sponsatum copularet Domino, Deus bone quantum sudatum est ab ipso? qua diligentia & sumptu viros doctissimos submittere, qua cura & delectu exemplares vbique collocare, qua vigilantia & labore scandalosos submouere incumbibat? In eum euentum seminaria fouit: Societatis I E s v Patres, Gedanum, in ipsum videlicet non minus omnis septentrionalis maritimæ iactationis, quam multiplicium transmarinarum hæresum, quas fluctus illi Anglici vel Belgici eiecerint portum tutissimum, fundatione pro Collegio facta introduxit, vt sensim animis errantium veritatis lux affulgere inciperet. Hæc cum vbique tentaret, nec illa ommittebat, vt zelo scientiam iunctam agnoscas, quæ ad compescendas



das temulentæ hæresis debachationes pertinerent. Nam cum modestam ignorantiâ, verbi diuini culturæ facilem per se & aptam esse intelligeret, superbam autem & ferocem hæresiarcharum proteruiam, quos male pereuntium ruina saginaret, omnem aspernari medicinam probasset, diuersis remediis eius aggrediendæ & sanandæ consilium inibat. Hinc Iurisdictionis Episcopalis autoritate & legum metu, alios in officio retinebat, alios prorumpentes percellebat, alios ferocientes corripiebat. Ciuitatis etiam ipsius Gedaneñ, altiores Spiritus quantum retuderit, vos ipsi meminisse potestis, si Comitiorum Cracouiẽ aliqua subit recordatio. Vbi in controuersia Ecclesiarum victos, & tanquam contumaces ad carcerem damnatos benignitate paterna & vere pastoralis magis adhuc vincendos putauit, & pœnæ remissionem à Rege & Senatu impetrauit. A quibus tamen quàm filiali obediẽtia exceptus paulo ante fuisset, commemoratione ista supersederem, nisi summi zeli & pastoralis promptitudinis exemplo, vna vos priuari nollem. Vt enim D. Chrysostomus ait: *non nauium gubernatorem, non ad bestias dimicantem, non ludo gladiatorio destinatum, non alium quempiam omninò sic ad discrimina & mortes paratum oportet habere animum, ac eum qui predicandi, seu quod in idem recidit, Episcopi officium suscipit.* Id ille sub primũ Ser<sup>mi</sup> Regis in Suetiã discessum, quem tanquam Episcopus loci in ipsam Ciuitatem comitatus fuerat, atque ibidem pro Ecclesiarum restitutione iure experiebatur, præclare ostendit: cum interim seu



ex nationū simultatibus seu quāpiam alia de causa, quod  
haud insolitum in illa Ciuitate memoratur, orto tumultu : Calviniani quibus cruenta Euangelia & sacrificia  
vbiq; magis arrident, eam occasionem se nactos rati, ple-  
beculæ multorum capitum belluæ, temerè ad arma con-  
uolanti, passim insonabāt, eripi sibi vi & Polonorum ar-  
mis Ecclesias, eoq; seditionē illam spectare. Ibi cum fœda  
quoquo versus strages ederetur parum aberat, quin ædi-  
bus Episcopi, iam iam vis intentaretur, nisi hospes peri-  
culum quod & ipse incurrebat, summo labore auertisset.  
tamen cum forte fortuna, Episcopo quo in discrimine  
esset statim nunciaretur : Conuersus ad familiam, vobis  
certe, inquit, consulite vt potestis, mei causa periculum  
nemo adeat, hic me præsto habebunt. Et humi ad o-  
rationes prouolutus, rogabat Deum vt se dignum mar-  
tirio faceret. Sed Ecclesiæ vtilitati adhuc seruabatur.  
Posterioribus enim annis ad triginta fere Parochiales Ec-  
clesias, ingentem sane Cerbero offam, è manibus hæreti-  
corum eripuit: cum quibus tot animarum millia ad gre-  
mium Ecclesiæ postliminio vel iam rediisse vel sensim re-  
ditura facilè coniicias. Et hæc quidem pauca ex multis  
de religionis restitutione suffecerint.

Disciplinam vero Ecclesiasticam, tam secularem  
quàm monasticam, quo zelo promouerit, nimis locuple-  
ti est testimonio Cathedra ipsa imprimis, quam mirificè  
in sua honestate retinuit, tum per vniuersam Diœcesim  
varia loca pia, & sexus vtriusq; Canobia, quorū reforma-  
tionem



tionem à S. D. N. sibi commissam magnis cum difficultatibus & sudore obibat. Hæc ut nihil aliud dicam, cum longe diuersam foris faciem & splendorem prætereuntibus exhibeat, nunc quam olim: intus quoque longe dissimiles reperiatis, illis quos aliquando memineras. *Ille enim quasi ignis conflans, & quasi herba fullonum, & sedebat conflans & emundans argentum, & purgabat filios Levi, & colabat eos tanquam argentum.* Et quidem non tam rigore aliquo, aut seueritate nimia, cuius plus semper erat in fronte & vultu, quam in opere & effectu; quam admirabili cupiditate animarum lucri & indefatigabili ad omnes labores deuorandos studio. Cum tacite quasi omnibus innuere de se videretur illud Diui Pauli. *Ipsi enim scitis quemadmodum oporteat imitari nos, quoniam non in quiete sumus inter vos, neque gratis panem manducamus ab aliquo, sed in labore & fatigatione die ac noctu laborantes, ne quem vestrum grauemus, non quasi non habeamus potestatem, sed ut nosmetipsos formam demus ad imitandum nos.* Nam certe fuit, quod omnes admirarentur, & imitando effingerent continuum illud & inexhaustum viri ingenium in suscipiendis pro Ecclesia laboribus in explebilem sitim in animarum, salute & conuersione æmulanda; in tota denique rite administrandi muneris sedulitate, exactum quendam calculum, dum non solum spiritualis sed etiam temporalis dispensationis, se rationes redditurum cogitaret. Quas sollicitudine præditum in promptu erat, in tantis redditibus Episc: recte collocandis, eam integritatem & iustiti-



am ostendisse, quam omnes quidem adhibendā esse intelligimus, sed vtinam omnes quoque illa vteremur.

Nullam quippe rationem carnis & sanguinis habendam, Canones sibi permisisse interpretabatur, nisi quam communis Eleemosinæ misericordia imponeret. Obuersabatur oculis morientis in vrbe, vnicus & is quidem pupillus ex fratre nepos. Patrimonio inquit meo sis contentus, te quicquam intuitu Eccles: acquisite attigisse, anathema sit. O vocem nostro septentrioni vt prope inauditam, ita imitatu dignissimam, quæ etiam in Vrbe quotquot peruasit rei nouitate quasi attonitos reddidit. vt nō immerito Deus, corpus etiā ipsius, in fundo Petri quiescere voluerit, qui tam Apostolicè patrimonium Christi dispensarat. Libertatum porrò Iurisdictionisque Eccles: in pristinum statum asserendæ, quantus ac qualis vindex fuerit, dicerem copiosius, nisi etiam hic nimis recentia exempla extare intelligerem, quæ certe iam post fata lydiū lapidem nacta non dubito: Erat enim quod metueret Episcopus is, Ezechielis illud. *Pro eo quod fuisti baculus arundineus Domui Israel, quando apprehenderunt te manu, & confractus es, ecce ego adducam super te gladium meum, & reliqua quæ minatur.* Erat inquam quod circumspiceret, ne Regale Sacerdotium, varia & multiplici in dies magis feruitute circumscriberetur, vt penitus aliquando respirare non posset. Idem curæ & sollicitudinis, circa latifundia Ecclesiæ ostendit. Ideoque in restaurandis & ædificandis Episcopatus bonis, splendidus & magnificus. vt nihil

supra



supra, in defendendis accerrimus, in ampliandis solertissimus, & in his omnibus inprimis conscientia tutissimus. Nam si quid interdum peccabatur, culpa semper ad alios pertinuit, quam ille haud commitebat, ne statim emendaret.

Habuiſtis iam vocationis & functionis Ecclesiasticae Idæam & normam: mentem adhuc Senatoriam & in Rempub. animum, si velimus penitius introspicere, apparebit facile, in commissionibus & legationibus quas obiuit, luculenter efficta & expressa. Fuit autem prima illa pro Comitibus Imperialibus Ratisbonam, à Stephano Rege ipsi iam creato Episcopo demandata: in qua eum se præstitit, vt non solum Rex ipse, verum vniuersa Il<sup>ma</sup> domus Bathoreorum non parum se ei debere profiteretur. Excipit hanc Transactio Bendzinensis, cuius felices & optatos exitus, Roma etiam ipsa in Clementis VIII. Pont. Max. auspiciis veneratur, qui ibidem Legatus præfuit, & ab eo tempore Episcopum hunc, plurimi semper fecit. Sequitur Legatio illa matrimonialis, quando piissimam illam Annam Reginam nostram Sereniss. Regi sponsam adduxit & coronauit. In his singulis, cum ex animi sententia cuncta successissent, difficultatibus autē grauissimis planè armata recordamur, quis non singularem viri prudentiam & integritatem suspiciat? ac teneriorem illum in patriam amorem admiretur? quem ex togata in armatam quoque Reipub. curam, quantum per munus licebat, transferre non dubitauit. Nam ad singulos



los ferè Tartaricarum incurſionum rumores, aulicum equitatum ſuum, ſemper eſſe in procinctu, iubere conſueuerat; & iam moriturus, ad Arcis Camenecenſis præſidium armis firmandum, non paruam pecuniam & Armamentarium ſuum legauit. Vtinam Rozrazoui, plures eo in genere, tui ſimiles Ciues habeamus; non tot noſtrates ſeruos omnis barbaria nobis oſtendat, quot iam oſtendat; non tantam vaſtita-tem, ſed conquerendi locus is nō eſt. Properandum enim mihi eſſe video, ne aliquid vobis vlterius debeam. Aud. vt cum iam Episcopum & Senatorem aſpexeritis, Rozrazouium vobis oſtendam, id eſt priuatæ ipſius vitæ honeſtatem & ſplendorem.

De nobilitate quidem generis quam plurimū in omne virtutis ſtudium & exercitium valere compertum eſt, multus eſſe nolo, cum ſatis Rozrazouiorum familia, tam extra quàm intra Regnum ſit per ſe illuſtris. Ille quidem vltra natalium ſplendorem, parentum ſuorum Comitæ Stanislai Caſtellani Rogoznenſis, & matris Miſko- uiæ, lectiſſimæ fæminæ, pietatem & deuotionem expreſſam magis referebat. qui Socolouio noſtro teſte, non curuarunt genua ſua ante Baal, auitæ religionis conſtantiſſimi cultores, in pauperes charitate & miſericordia planè diffuentes, vt nunquam ferantur, non ſibi tantum quod minus mirum, ieiuniorum uſu exercitatis, ſed ne quidem filiis ſuis paruulis panem porrexiffe, priuſquam pauperes manu ſua reſeciſſent. Ex quo hoſpitalitatis nido, iſtum Episcopum profectum, in pauperes tota vita hoſpitaliſſimum

num, & assiduis eleemosinis seipso in dies maiorem, ideo in Episcopatus commemoratione non attigi, licet vel in hoc solo esset præstantissimus: cum non pauca per vniuersum Episcopatum hospitalia restaurasset, dotasset, de nouo etiam ædificasset, Montes vt vocant pietatis instituisset, pupillos & afflictos subleuasset, egentes turmatim aluisset, & in Vrbe præsertim, peregrinorum certo numero, quotidie mensam præberet; externos pariter, ac omnium fere ordinum religiosos, non contemnendis in singulos menses assignatis eleemosinis, iuuaret: hæc inquam cum per totos Episcopatus dies ageret, à me tamen hoc loci potius recensentur, quod hanc virtutem domo sua hæreditariam quasi ad Episcopatum attulerit, quamuis quod in gleba vbere & fertili translatis plantis accidere solet, sælicius multo pululantem, sed quæ nihilominus, ad suas radices, vnde surculus iste effloruit, iucundius conspiciatur. Ex iisdem domesticæ pietatis fontibus oriebatur & illud, vt instillatum sibi à parentibus, illum amorē diuinum & præceptorum eius tenacitatem, haud potuerit satis toto vitæ tempore, vel meditationibus, vel quotidianis prope Missæ Sacrificiis, & aliis Spiritualibus exercitiis, vnquam explere; cum à parentibus præmansum sibi, in succū & sanguinē conuertisset Deutoronomij illud: *Eruntq; verba hæc, quæ precipio tibi, hodie in corde tuo, & narrabis ea filiis tuis, & meditaberis sedens in domo tua, & ambulans in itinere, dormiens atque consurgens; & ligabis ea quasi signum in manu tua, eruntq; & mouebuntur ante oculos tuos, scribesq; ea*



*in limine & ostiis domus tuæ.* Verè enī, vbi negotiis publicis, aut priuatis, vel amicorū officiis tempus tribuisset: haud citius aliò, non solum mente, & altioribus suspiriis, sed etiam sermonibus reccurrebat, quam ad diligens diuinorum præceptorum examen, si contra quod commissum, vel forte ommissum fuisset. His duobus materni lactis alimentis, reliquam ætatem saginauit. Nam & adolescentiam ex tam longinquis peregrinationibus & diuturna in Aula Regum Galliæ commoratione intactam & illibatam senectuti & tandem morti tradidit. virilem in curia Pij V. Pontificis Maximi, re & nomine pijssimi, cuius Camerariū egit, magna virtutum vbertate & prudentia confirmauit; a quo etiam in Gallias ad Carolum IX. Regem missus fuerat. Hos demum maturiores annos, totos Ecclesiæ & patriæ dicauit, constantia in omni opere suo admirabili & minimè fucata sinceritate. Recordatus illius Eccle: *Non te ventiles in omnem ventum, & non eas in omnem viam, sic enim omnis peccator probatur in duplici lingua. Esto firmus in via Domini, & in veritate sensus tui & scientia, & prosequatur te verbum pacis & iustitia.* Hinc fiebat, vt paucas ille quidem sed illustres & firmas amicitias coluerit. Adulationis autem omnis ita expers, vt cum téperare sibi non posset quin vitia perstringeret, quos nollet etiam interdum offenderet. Popularis auræ contemptor, quam sciret sæpenumerò deterioribus artibus conciliari. In iram aliquantum procliuor, sed quam profunda humilitate expiabat, vbi deferbuisset

ferbuiſſet. Vt illud D. Pauli dicere potuerit. *Gloria-  
bor in infirmitatibus meis, vt inhabitet in me virtus Chriſti.*  
Namque tot poſtea deprecationibus laborabat apud  
q uem offenderat, vt penè magis ipſa viri tãti, tam demis-  
ſa abiectio doleret, quam ſi quæ fuiſſet iniuria. Quod  
indifferentè & ad familiares ſuos transferrebat. Quo-  
rum non herilem tantummodo, ſed paternam planè cu-  
ram agere conſueuerat: non quæ corporis ſolum, com-  
petenter, ſed quæ animi diligentiffime curare & prouide-  
re: otia ipſorum nulla ratione pati: ingenia quæ quis ad-  
ferret exercere & cultura meliora reddere: rationes ipſo-  
rum promouere: merita ſummo iudicio cenſere: ſuæ de-  
nìque nationis hominibus externos nunquam propone-  
re: licet & linguarum morùmque multorum peritus, ex-  
ternis quoque delectaretur, & penes ſe foueret.  
Iam litteras & litterarũ cultores, quo ſtudio & liberalita-  
te ornarit, longa enumeratione opus eſſet, quos inter  
& vos ornatiffimi Academici fuiſtis ſemper, & ſi fata vi-  
tam non inuidiſſent magis adhuc fuiſſetis. vt non imme-  
ritam quidem, ſed quod non niſi bonus ager ſolet, cum  
ſcœnore gratitudinem veſtram deſuncto iam reddatis,  
cum non ſolum orationum, verũ etiam Eleemoſinæ ſym-  
bola iſta, pia & liberali manu ad altare Deo offertis: quaſi  
non vniuerſa tantum Academia, ſed ſinguli ex tam lon-  
go ordine veſtro, ſuo, & ſtudioſorum omnium Quæſto-  
ri, parentare videamini. Porrò in victu & amictu fru-  
galitas ſumma, luxus & ſordes nullæ. Et vt multa



paucis comprehendam, in Episcopatu verus Pastor, in Repub. integerrimus Senator, in Ecclesia scientissimus Præsul, domi honestissimus Sacerdos, foris vir grauissimus, intus vir optimus : in sententia rectus, in iudicio incorruptus, in consilio candidus, in opere prudens, in verbis constans, in factis acer: malis rigidus, bonis benignus: natura & fronte seuerior, vita & institutione cultior: Omnis vitij osor & flagellum, probitatis amator & remunerator: & vltimo tandem vir, cuius vltima primis conuenisse Deus ostendit, cum in vrbe, ad eandem plane B. V. M. imaginem, in templo SS. nominis I E s v, ante triginta annos primum, & hoc centenario Iubilæo, vltimū Sacrum celebrasse ipsum voluerit: & in eodem penitus loco, confessione generaliore, peccatorum onus deponere, vbi corporis exuuias tumulo conditurus erat, vt quod semper ipse optarat, inter Sanctæ Vrbis venerandos cineres quiesceret.

Nos autem Audit. amplif. si corpus tanti viri amplius exosculari non possumus, quod fæliciori sorte Romanis contigit, vt ad ipsius cadauer accurrentes, virum ipsum, & in eo virtutem & famam viri exoscularentur: Si deus nobis in patria, loco cinerum suorum, animi ipsius verum habitum, ingenij vim, vitæ exempla, laborum fructum, reliquit; vt tantum Episcopum & Senatorem, ætas ventura, magis etiam narratura sit: memoriam certè ipsius qua par est præsentī beneuolentia & pietate complectamur: & lachrymas quidem nullas, sed vota potius fun-


us fundamus, vt Deus præpotens quem Rozrazouio hu  
ic, dederat in Ecclesia zelum, in Repub. integritatem, in  
vita priuata castitatem & sanctimoniam, cuncta hæc ad  
præclarissima posterorum ornamenta perpetua esse velit.  
Cætera autem, si quæ fuere næuorum similia, quæ iam  
hoc Sacrosancto Reuerendis. Præsulis Sacrificio expiatur,  
sint nobis omnibus incitamento, vt quam minimis vrge-  
ri studeamus. Cum si quemlibet omnia opera sua sub-  
uereri cum D. Paulo tutius sit, inter quantumuis exag-  
geratas virtutes, Dei tremenda iudicia humiliter nobis  
sint expectanda. Ille enim est qui per Hieremiam dicit.  
*Quis est similis mei, & quis sustinebit me, & quis ipse pastor  
qui resistat vultui meo? Sed tamen Pastor, o Dñe. Auris  
audiens beatificauit illum, & oculus videns testimonium red-  
didit illi, eo quod liberasset pauperem vociferantem & pupillum  
cui non erat adiutor, benedictio petitori super eum veniebat, &  
cor viduæ consolatus est. Tu autem Deus noster, suavis, & ve-  
rus, & patiens es, & in misericordia disponis omnia,  
miserere.*

D I X I.











BIBLIOTH. UNIV.



JAGELLONICAE





Biblioteka Jagiellońska



stdr0019499

A white rectangular label is pasted onto the bottom right corner of the blue cover. It contains a barcode with vertical black bars of varying widths. Above the barcode, the text "Biblioteka Jagiellońska" is printed in a small, black, sans-serif font. Below the barcode, the alphanumeric string "stdr0019499" is printed in the same font.



